



*Ko te Rōpū Tautoko, arā te hunga whakahaere i te Pūtea Mā Te Reo. (Kei muri, mauī-matau) Te Ururoa Flavell, Keith Ikin, Hugh Karena, Evelyn Tobin. (Kei mua, mauī-matau) Manahi Paewai, Hana O'Regan, Haami Piripi, Trevor Moeke.*

Nō te mutuka o tērā tau i tae mai te tonoa a te Minita Māori kia noho au hei mema mō tētahi pōari whakahaere i te pūtea tekau mā rima miriona tāra e kīia nei, ko “Mā Te Reo”. Tokowaru mātou i Te Rōpū Tautoko, ā, kua riro i a mātou te mahi whakahaere i tēnei pūtea. Ko tōna tikaka, ka tohaina te rua miriona tāra ia tau, ia tau, kia pau rā anō te pūtea.

Mā te aha tēnei pūtea? Mā te reo! Ko tōna tikaka hai tautoko i kā hāpori Māori ki te whakahiato, ā, ki te whakahaere anō hoki i ā rātou ake kaupapa whakaora reo. Kai te mōhio mātou katoa ki kā tūmomo tauārai i roto i tēnei ao hurihuri mō te huka e whai ana i te reo Māori, ā, ko tētahi ko te taha pūtea.

Ehara i te mea mā tēnei tekau mā rima miriona tāra ērā āhuataka katoa e whakakore, e whakatika. Ehara! He tūmatataka noa iho tēnei; heoti anō, he pai ake te iti i te kore. Ko te tūmanako kē, mā tēnei pūtea e whai wāhi te huka e kākaunui ana ki te reo Māori, ki ētahi huarahi mā rātou anō e whakarite.

E hia kē nei kā kaupapa ka tautokona e Te Rōpū Tautoko. Me hā kai tonu kā tonoa katoa ki kā whāika matua e toru, arā ki te whakanui ake i te huka e mātau ana ki te reo Māori; ki te whakapakari ake i te huka e matatau ana ki te reo, ā, ki te whakanui anō hoki i te whaiwāhitaka o te huka kōrero reo Māori ki te whakamahi i tō tātou reo.

Nā reira ki te ū tika kā kaupapa ki ēnei whāika, kāre he tawhā o te whakaaro, o te moemoeā.

Kua roa tātou e moemoeā ana mō kā tūmomo kaupapa hei whakaara ake, hei whakaora ake anō i tō tātou reo. Nā, ko tēnei tētahi o kā huanui hei whakatinana i aua moemoeā, i aua āwhero, kia kaua e noho noa ki te ao o whakaaro, ā haere ake nei.

Mēnā he tūmanako ōku mō te pūtea nei, kia kitea rā anō te toroka atu o te rikarika o te reo ki kā whānau e noho ana i roto i kā kāika i kā tōpito katoa o te motu nei. Mā tēnā tō tātou reo e mana ai.

Kua whati te tai, ka pao tōrea.